



Usvojen izvještaj o radu Vijeća ministara

STEŽEMO OBRUČ OKO KRIMINALACA

U 13 operativnih akcija slobode je lišeno više desetina osoba, navodi se u Strategiji za borbu protiv organiziranog kriminala

Državni ministri jučer su usvojili izvještaj o radu Vijeća ministara BiH za 2015, u kojem se navodi da je u prošloj godini održano 57 sjednica, na kojima je razmotreno 1.115 tačaka i urađeno 1.178 zaključaka, te je značajno dinamiziran proces evropskih integracija. U junu 2015. stupio je na snagu Sporazum o stabilizaciji i pridruživanju, kojim je uspostavljeno blisko partnerstvo između EU i BiH, odnosno našoj je zemlji potvrđen status potencijalne kandidatkinje za članstvo.

13 velikih akcija

U prošloj godini usvojena je Ekonomska reformska agenda za period 2015 - 2018, kao i niz strategija među kojima su Strategija za borbu protiv korupcije BiH 2015 - 2019, ona za borbu protiv terorizma i organiziranog kriminala, Strategija reforme sektora pravde u BiH i Strategija za integrirano upravljanje granicom 2015 - 2018. Generalni sekretarijat dostavit će izvještaj o radu Vijeća ministara PSBiH, saopćeno je iz VM-a.

Usvojen je i izvještaj Ministarstva sigurnosti o provođenju Strategije za borbu protiv organiziranog kriminala (2014 - 2016) za period 1. 7 - 31. 12. 2015, u kojem se navodi da su nadležne institucije u BiH za šest mjeseci prošle godine provele više od 80 aktivnosti u oblasti borbe protiv organiziranog kriminala. Nadležna policijska tijela i tužilaštva u BiH u drugom polugodištu prošle godine ostvarila su zapažene rezultate u istragama organiziranog kriminaliteta. U 13 velikih operativnih akcija koje su proveli **SIPA**, entitetska i kantonalna ministarstva unutrašnjih poslova u

saradnji s nadležnim tužilaštvima u BiH, slobode je lišeno više desetina osoba. Nekoliko akcija koordinirano se vodilo u saradnji s nadležnim policijskim tijelima i tužilaštvima zemalja u okruženju te zemljama EU. Imenovani su članovi Organizacionog odbora za pripremu i organizaciju Biznis foruma 16+1 (Kina i države srednje i istočne Evrope), kojim će predsjedavati ministar vanjske trgovine i ekonomskih odnosa Mirko Šarović. Riječ je o Biznis forumu koji bi se trebao održati početkom maja u BiH, radi boljeg ekonomskog povezivanja BiH i zemalja regije s Kinom. U Organizacionom odboru bit će državni ministri finansija i trezora Vjekoslav Bevanda, vanjskih poslova Igor Crnadak, zamjenik ministra komunikacija i prometa Saša Dalipagić, šef kabineta predsjedavajućeg Vijeća ministara Asja Nikšić, predsjednik Vanjskotrgovinske komore BiH Bruno Bojić, predstavnik resorne komisije

PSBiH, predstavnici entitetskih privrednih komora, te nadležnih bh. agencija.

Najuspješniji kandidati

Na prijedlog Ministarstva civilnih poslova, imenovano je šest članova Odbora Agencije za predškolsko, osnovno i srednje obrazovanje. Na mandat od tri godine imenovani su Alisa Ibraković, Semir Halilović, Franjo Ljubas, Zdenka Leženić, Bojan Golić i Uma Isić, kao najuspješniji kandidati nakon održanog javnog konkursa. **A. G.**

BIZNIS FORUM

Imenovani su članovi Organizacionog odbora za pripremu i organizaciju Biznis foruma 16+1, na čijem je čelu Mirko Šarović



Predsjedavajući Denis Zvizdić: Izvještaj pred Parlamentom BiH